

## Allannguutissatut siunnersuut

uunga

**Uunga siunnersuut: Unammilleqatigiinneq pillugu Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2019-imeersoq** (Attaveqatigiissutinik elektroniskiusunik suliassa qarfirmi aalajangersimasumi unammilleqatigiinnermik aqutsinerup aningaasalersorneqarnera Unammilleqatigiinnermut Ataatsimiititaliamilu ilaasortassanik toqqaasarneq)

Naalakkersuisunit aappassaaneerinninnissamut saqqummiunneqartoq.

## Qulequtaanut

1. Qulequtaa ima oqaasertalerneqassaaq:

**“Uunga siunnersuut: Unammilleqatigiinneq pillugu Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2019-imeersoq** (Suliaqarfiit aalajangersimasut siunnerfigalugit elektroniskiusunik attaveqatigiinnermut atatillugu unammilleqatigiinnermik aqutsinerup aningaasalersornera kiisalu Unammilleqatigiinnermut Ataatsimiititaliami ilaasortassanik toqqaasarneq)”

## § 1-imut

2. *Nr. 1-imi qulequtassatut* siunnersuutigineqartoq aamma § 23 s imatut oqaasertalerneqassapput:

*“Suliaqarfiit aalajangersimasut siunnerfigalugit unammilleqatigiinnermik aqutsinerup aningaasalersornera*

§ 23 s. Suliaqarfiit aalajangersimasut siunnerfigalugit elektroniskiusunik attaveqatigiinnermut kiffartuussinernullu atatillugu unammilleqatigiinnermik aqutsinerup aningaasalersorneranut attaveqatigiinnermut attaviliisarnermut pisussaaffilerneqarsimasut tuniniaasartut, tak. § 23 j, allaffissornermut akiliummik akiliisassapput.

*Imm. 2.* Atuisartoqarnermut Unammilleqatigiinnermullu Aqutsisoqarfik akiliutip, tak. imm. 1, attaveqaatinik tuniniaasartut akornanni qanoq agguanneqarnissaa pillugu aalajangiisassaaq.

*Imm. 3.* Imm. 1 naapertorlugu akiliut Aningaasanut inatsimmi aalajangerneqartassaaq.”

3. Nr. 2-mi siunnersuutigineqartoq § 27 imatut oqaasertalerneqassaaq:

” § 27. Unammilleqatigiinnermut Ataatsimiititaliaq siulittaasoqarpoq arfinilinnillu ilaasortaqarluni.

*Imm.2.* Siulittaasoq ilaasortallu piffissamut ukiut sisamat tikillugit sivilissusilimmut Naalakkersuisunit toqqarneqassapput.

*Imm. 3.* Unammilleqatigiinnermut Ataatsimiititaliaq pisortani namminersortunilu inuussutissarsiornermi suliffeqarfinnut tamatigoortunik ilisimasaqassaaq, ilanngullugit inatsilerinnermut, aningaasaqarnermut, aningaasalersuisarnermut aamma atuisartoqarnermut tunngassuteqartut.

*Imm. 4.* Siulittaasoq aamma Unammilleqatigiinnermut Ataatsimiititaliami ilaasortat ikinnerpaamik pingasut inuussutissarsiornermi atuisartoqarnermilu soqutigisaqarnermut attuumassuteqassanngillat.

*Imm. 5.* Naalakkersuisut inuussutissarsiornermut kattuffiit ataatsimoortut inassuteqarnerat malillugu ilaasortaq ataaseq, atuisartoqarnermut kattuffinnit ataatsimoortunit inassuteqaat malillugu ilaasortaq ataaseq, aamma kommunit ataatsimoorlutik inassuteqarnerat malillugu pisortat inuussutissarsiornermik ingerlatsinerannik immikkut ilisimasaqartoq ilaasortaq ataaseq toqqartassavaat.

*Imm. 6.* Unammilleqatigiinnermut Ataatsimiititaliami ilaasortat inuttut suliatigullu piginnaasaqarnerat tunngavigalugu toqqarneqartassapput, aammalu sulinerminni arlaannaannulluunniit attuumassuteqannigsumik atuutissallutik.”

Siunnersuummut nassuiaatit

### **Nalinginnaasumik nassuiaatit**

Inuussutissarsiornermut Aatsitassanullu Ataatsimiititaliap isumaliutissiissutaata malitsigisaanik allannguutissatut siunnersuut saqqummiunneqarpoq. Siunnersuummi taamaalilluni allannguisoqarpoq allaffissornermut akiliut taamaallaat unammilleqatigiinnermut inatsit naapertorlugu akileqquneqarsinnaalerlugu. Tamatuma saniatigut allannguutissatut siunnersuutip kingunerissavaa kommunit ataatsimoorlutik Unammilleqatigiinnermut ataatsimiititaliami ilaasortassamik immikkut pisortat inuussutissarsiornermik ingerlatsinerannik ilisimasaqartumik toqqaasassasut.

Taamatutaaq oqaaseqaatitigut allannguuteqartoqarpoq.

### **Aalajangersakkanut ataasiakkaanut nassuiaatit**

Nr. 1-imut

Allannguut qulequtaanut inatsisilioriaatsikkut naqqiutaavoq.

Nr. 2-mut

Oqaasertaliinerup allangortinneqarnera Inuussutissarsiornermut Aatsitassanullu Ataatsimiititaliap ilaatigut akiliummik aamma akitsuutinik akiliisarnerup pillugu erseqqissaanissamik kiisalu niuerfiusuni ineriartornermut sillimanissamik kissaateqarnermik tunngaveqarpoq.

Nr. 3-mut

Unammilleqatigiinnermut Ataatsimiititaliap katitigaanerani kommunit sunniuteqarunnaanginnissaaannik Inuussutissarsiornermut Aatsitassanullu Ataatsimiititaliap kissaateqarneranik allanguineq tunngaveqarpoq.